

[Augsburg], 23. Juni 1575

An Theodor Zwinger

UB Basel, Fr. Gr. II 5, Nr. 116.

S. Quas Bibliopolis nostratis verno mercatu, ad te dedi Francofordiam preferendas, et inde per aliquem ciuium vestratium Basileam curandas: intercidisse puto: Quod eò aequiore animo fero, quod literae nostrae NON DE VI NEQVE CAEDE NEC VENENO etc. sed de meis nugis agunt. Scripseram autem, habere me σύμμικτα πάντοδαπά in Ciceronem et alia quaedam, quae libellum octaua forma mediocrem possent conficere: 40 circitè paginarum. A te ergo, V[ir] CL[arissime], D[omine] et a[mice] c[olende], petebam consilium, an esset isthic aliquis typographus (incudem, tametsi mihi amicam, ob fuliginem et ustulationes, deprecor) qui eas et maturè et emendatè imprimere dignaretur. Idqúe adhuc per occasionem ex te cupio cognoscere. Oporiniani timent ἀπρασίαν: quam ego nemini sanè praestare possum. Pecuniae nihil ab ijs exigerem, 40 exemplis contentus. Nam eorum fidem et diligentiam probo, in Isocrate meo praestitam. Nam quae praetermissa sunt, ea nequaquam illis imputo: sed obliuioni Oporini nostri. Episcopius liberalitatem erga me suam, Demosthene minimè ex sententia mea, neque ut decuit, edito, veluti generosum vinum aqua sordida infusa, male diluit: idemqúe περὶ τῆς γνωμολογικῆς ἀπρασίας, praeter opinionem meam, conquestus est: et voluminibus iuridicis occupatum, tales minutias contemnere arbitror. Quare nihil ad eum posthac deferre ausim: nisi tu aliud censueris, in cuius autoritate, tanquam Delphici tripodis, acquiescam. Interim ego penè per summos cruciatus mortuus, vix in vitam reuocatus sum lapide duarum unciarum, et oui gallinacei magnitudine e vesica exciso, ab Hiero[nymo] Stromero nostrate, utriusque medicinae doctore, et solertissimo et fortunatissimo in hoc genere. Cum autem carnificina illa subeunda esset, legaui de curta mea supellectile alijs alia: tuae verò excellentiae tenue μνημόσυνον mei, anulum aureum tortilem, triplicem, 4 ducatorum circitè pondere, eumqúe nunc, per istum ciuem tuum, ita mitto, ut, si leuidense hoc munusculum aequi boniqúe feceris, magno abs te beneficio me affectum esse sum iudicaturus. Vale. et per occasionem paucis rescribito. Ego operam dabo, nugas meas ut ante autumnum confectas, Francofurtum mitti possint: quò per hyemem (si quis dignabitur eas suo praelo) excudantur. Priuigno tuo Io[anni] Iacobo S[alutem] precor et significo Hainzelium, sodalem eius, nunc esse sponsum. 23 Iunij 1575.

Hiero[nymus] Wolfius  
Tuus.